



Broj: 02-50-1-16-17/08
Sarajevo: 20.6.2008. godine

**BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM**

PREDMET: Obavještenje

Dom naroda Parlamentarne skupštine BiH, na 18. sjednici, održanoj 17.6.2008. godine, razmatrao je sljedeće:

1. Prijedlog zakona o lijekovima i medicinskim sredstvima (drugo čitanje), predlagač: Vijeće ministara BiH;
2. Prijedlog zakona o izmjenama i dopunama Zakona o jedinstvenom matičnom broju (drugo čitanje), predlagač: Vijeće ministara BiH;
3. Prijedlog zakona o izmjenama i dopunama Zakona o ličnoj karti državljana BiH (drugo čitanje), predlagač: Vijeće ministara BiH;
4. Prijedlog zakona o izmjenama i dopunama Zakona o prebivalištu i boravištu državljana BiH (drugo čitanje), predlagač: Vijeće ministara BiH;
5. Prijedlog zakona o izmjenama i dopunama Zakona o krivičnom postupku BiH (drugo čitanje), predlagač: Vijeće ministara BiH;
6. Prijedlog zakona o plaćama i naknadama u institucijama Bosne i Hercegovine (drugo čitanje), predlagač: Vijeće ministara BiH;
7. Prijedlog zakona o Agenciji za identifikacione dokumente, evidenciju i razmjenu podataka BiH (drugo čitanje), predlagač: Vijeće ministara BiH;
8. Prijedlog zakona o izmjenama i dopunama Zakona o polaganju pravosudnog ispita u BiH (drugo čitanje) predlagač: Vijeće ministara BiH;
9. Prijedlog okvirnog zakona o srednjem stručnom obrazovanju i obuci u Bosni i Hercegovini (prvo čitanje), predlagač: Vijeće ministara BiH;
10. Prijedlog zakona o izmjenama i dopunama Zakona o udruženjima i fondacijama BiH (prvo čitanje), predlagač: Vijeće ministara BiH;
11. Prijedlog zakona o graničnoj kontroli, sa Mišljenjem Zajedničke komisije za odbranu i sigurnost (prvo čitanje), predlagač: Vijeće ministara BiH;
12. Izvještaj Zajedničke komisije za usaglašavanje teksta o Prijedlogu zakona o izmjenama i dopunama Zakona o upotrebi i zaštiti naziva Bosne i Hercegovine;
13. Imenovanje tri člana u Komisiju za usaglašavanje teksta Prijedloga zakona o Fiskalnom vijeću BiH;
14. Imenovanje generalnog revizora i zamjenika generalnog revizora (kandidatsku rang-listu dostavila Komisija za izbor generalnog revizora i zamjenika generalnog revizora);
15. Imenovanje tri delegata iz Doma naroda u Ad hoc komisiju za provođenje procedure za imenovanje:
 - a. Nezavisnog odbora kao nezavisnog tijela policijske strukture Bosne i Hercegovine,
 - b. Odbora za žalbe građana kao nezavisnog tijela policijske strukture Bosne i Hercegovine.

16. Razmatranje izvještaja o radu za 2007. godinu zajedničkih komisija oba doma:
 - a. Zajedničke komisije za odbranu i sigurnost BiH,
 - b. Zajedničke sigurnosno-obavještajne komisije za nadzor nad radom Obavještajno-sigurnosne agencije BiH,
 - c. Zajedničke komisije za ljudska prava, prava djeteta, mlade, imigraciju, izbjeglice, azil i etiku,
 - d. Zajedničke komisije za administrativne poslove,
 - e. Zajedničke komisije za evropske integracije,
 - f. Zajedničke komisije za ekonomske reforme i razvoj.
17. Davanje saglasnosti za ratifikaciju Strazburskog sporazuma o međunarodnoj klasifikaciji patenata, zaključenog 24. marta 1971., a izmijenjenog 28. septembra 1979.;
18. Davanje saglasnosti za ratifikaciju Evropske konvencije o nezastarijevanju zločina protiv čovječnosti i ratnih zločina, Strassbourg, 25. januar 1974.;
19. Davanje saglasnosti za ratifikaciju Konvencije o zaštiti nematerijalne kulturne baštine (UNESCO) – Pariz, 17. oktobra 2003.;
20. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o saradnji u borbi protiv terorizma, organiziranog kriminala, nelegalne trgovine narkoticima, psihotropnim supstancama i prekursorima, ilegalne migracije i ostalih krivičnih djela;
21. Davanje saglasnosti za ratifikaciju Sporazuma između Vijeća ministara BiH i Vlade Republike Makedonije o readmisiji lica koja nezakonito borave;
22. Davanje saglasnosti za ratifikaciju Okvirnog sporazuma između BiH i Komisije Evropskih zajednica o pravilima saradnje koja se odnose na finansijsku pomoć EZ-a Bosni i Hercegovini u okviru realizacije pomoći kroz instrumente pretprijetne pomoći (IPA);
23. Davanje saglasnosti za ratifikaciju Dvogodišnjeg sporazuma o saradnji (BCA) između BiH i Regionalnog ureda Svjetske zdravstvene organizacije za Evropu 2008/2009;
24. Davanje saglasnosti za ratifikaciju Odluke o ratifikaciji Budimpeštanskog sporazuma o međunarodnom priznavanju depozita mikroorganizama radi postupka patentiranja, Budimpešta, 28. april 1977. i izmijenjen 26. septembra 1980.;
25. Davanje saglasnosti za ratifikaciju Protokola koji se odnosi na Madridski sporazum o međunarodnoj registraciji žigova, Madrid 27. juna 1989.;
26. Davanje saglasnosti za ratifikaciju Međunarodne konvencije o zaštiti umjetnika izvođača, proizvođača fonograma i radiodifuznih organizacija, Rim, 26. oktobar 1961.;
27. Davanje saglasnosti za ratifikaciju Konvencije o zaštiti proizvođača fonograma od nedozvoljenog umnožavanja njihovih fonograma, Ženeva, 29. oktobar 1971.;
28. Davanje saglasnosti za ratifikaciju Statuta, Općih principa i Proceduralnih pravila Komisije Codex Alimentarius;
29. Davanje saglasnosti za ratifikaciju Evropske socijalne povelje (revidirane), Strassbourg, 3. maj 1996.;
30. Inicijativa za rješavanje pitanja decertificiranih policajaca Bosne i Hercegovine, predlagač: Zajednička komisija za ljudska prava, prava djeteta, mlade, imigraciju, izbjeglice, azil i etiku.

Ad. 1.

Dom naroda usvojio je Zakon o lijekovima i medicinskim sredstvima sa osam amandmana koji su identični amandmanima usvojenim u Predstavničkom domu.

Amandman I.

U članu 2. iza tačke 32) dodaje se nova tačka 33), koja glasi: „KONTROLNA LABORATORIJA AGENCIJE, kao organizacioni dio Agencije za lijekove i medicinska sredstva Bosne i Hercegovine je laboratorija nadležna za ispitivanje i kontrolu kvaliteta lijekova i ocjenu dokumentacije o kvalitetu lijeka (farmaceutsko-hemijsko-biološko-mikrobiološka).“

Amandman II.

U članu 2. dosadašnja tačka 33), koja postaje tačka 34), mijenja se i glasi: „OVLAŠTENA LABORATORIJA je laboratorija angažirana od Agencije za lijekove i medicinska sredstva Bosne i Hercegovine, u skladu s ovim zakonom, za poslove specifičnih analiza, a koja se nalazi u mreži Službenih kontrolnih laboratorija za lijekove (OMCL Official Medicine Control Laboratories), ili laboratorija ovlaštena od Agencija za lijekove i medicinska sredstva Bosne i Hercegovine za poslove ispitivanja lijekova u toku procesa razvoja i/ili proizvodnje lijeka a prije podnošenja zahtjeva za proizvodnju ili promet lijeka, ili laboratorija ovlaštena odnosno priznata od Agencije za lijekove i medicinska sredstva Bosne i Hercegovine za poslove kontrole kvaliteta svake serije proizvedenog odnosno uvezenog lijeka.“

Postojeća tačka 34. postaje tačka 35, a ostale tačke ovog člana od 35. do 56. mijenjaju redoslijed i postaju tačke od 35. do 57.

Amandman III.

U članu 9. stav (2) iza riječi „sredstva“ briše se interpunkcijski znak i riječi: „ili poslove kontrole lijekova“, a preostali tekst ostaje isti.

Amandman IV.

U članu 17. stav (5) iza riječi: „najmanje pet godina“ stavlja se tačka a preostali dio teksta briše se.

Amandman V.

U članu 58. stav (5) tačka 1) mijenja se i glasi:
 „Da ima osiguran odgovarajući prostor, opremu i kadar za proizvodnju, ispitivanje i kontrolu kvaliteta u skladu s obimom i zahtjevima proizvodnog postupka ili potpisane odgovarajuće ugovore kojima dijelove proizvodnog procesa i analize povjerava trećoj strani, te uslove za skladištenje i otpremu lijekova.“

U stavu (9) iza riječi „nadzora“ dodaje se tekst: „te uslove za ugovorenu proizvodnju i kontrolu“, a ostali dio teksta ostaje nepromijenjen.

Amandman VI.

U članu 65. stav (1) tačka 2) mijenja se i glasi: „imati zaključen ugovor s laboratorijem za lijekove, u skladu s odredbama člana 79. ovog zakona.“

Amandman VII.

Član 79. mijenja se i glasi:

Vrste kontrola kvaliteta lijekova

(1) Kontrola kvaliteta lijekova koju obavlja Kontrolna laboratorija Agencije je:

- 1) redovna kontrola kvaliteta svih lijekova koji su u prometu u BiH i koja se obavlja najmanje jednom u pet godina;
- 2) kontrola kvaliteta prve serije lijeka prije stavljanja u promet i prilikom obnove i varijacija koje zahtijevaju kontrole kvaliteta;
- 3) kontrola kvaliteta svake serije proizvedenog, odnosno uvezenog lijeka i supstance;
- 4) vanredna kontrola kvaliteta odnosno kontrola kvaliteta lijeka koja se provodi na zahtjev Agencije u toku pribavljanja dozvole za stavljanje lijeka u promet ili nakon njenog pribavljanja;

- 5) posebna kontrola kvaliteta, odnosno kontrola kvaliteta svake serije rizičnih i drugih specifičnih kategorija lijekova.
- (2) Izuzetno od stava (1) ovog člana, kontrolu kvaliteta lijeka iz stava (1) tačka 3) može provesti laboratorija ovlaštena odnosno priznata od Agencije za lijekove i medicinska sredstva Bosne i Hercegovine.
- (3) U slučaju kada kontrolu kvaliteta lijeka predviđenu stavom (1) tačka 3) ovog člana provodi Kontrolna laboratorija Agencije, proizvođač/uvoznik dužan je prije stavljanja u promet dostaviti Agenciji uzorak, a rok za provođenje takve kontrole je 30 dana.
- (4) U slučaju kada kontrolu kvaliteta lijeka predviđenu stavom (1) tačka 3) ovog člana provodi ovlaštena odnosno priznata laboratorija, proizvođač/uvoznik dužan je prije stavljanja u promet Agenciji dostaviti uzorak i nalaz oizvršene kontrole.
- (5) Na prijedlog direktora Agencije, Stručno vijeće detaljno propisuje način i obim provođenja kontrole kvaliteta iz stava (1), pripremljene od Kontrolne laboratorije Agencije.

Amandman VIII.

U članu 140. stav (10) u posljednoj rečenici dio teksta iza riječi „otpremninu“ mijenja se i glasi: „u visini iznosa šestomjesečne plaće. Visina pomenute otpremnine povećava se na 12 mjeseci za državne službenike koji imaju najmanje 15 godina radnog staža.“

Ad. 2.

Dom naroda jednoglasno je usvojio Zakon o izmjenama i dopunama Zakona o jedinstvenom matičnom broju sa jednim amandmanom:

Amandman I.

U članu 255. iza stava (2) dodaje se stav (3), koji glasi:

„U roku od 90 dana od dana stupanja na snagu ovog zakona, organ koji vodi centralnu evidenciju u skladu sa zadatkom kojim se uređuje oblast centralne evidencije i razmjene podataka u BiH donosi propise o:

- a. zaštiti podataka o centralnoj evidenciji, u skladu sa Zakonom kojim se uređuje zaštita podataka u BiH;
- b. načinu dostave podataka;
- c. načinu razmjene podataka između organa koji vode centralnu evidenciju i nadležnih organa“.

Budući da je Zakon usvojen u različitom tekstu u odnosu na Predstavnički dom, Dom naroda imenovao je sljedeće delegate za članove Zajedničke komisije za postizanja sporazuma o identičnom tekstu Zakona: Almu Čolo, Ivu Miru Jovića i Dragu Ljubičića.

Ad. 3.

Dom naroda jednoglasno je usvojio Zakon o izmjenama i dopunama Zakona o ličnoj karti državljana BiH u identičnom tekstu kao i Predstavnički dom.

Ad. 4.

Dom naroda jednoglasno je usvojio Zakon o izmjenama i dopunama Zakona o prebivalištu i boravištu državljana Bosne i Hercegovine u identičnom tekstu kao i Predstavnički dom.

Ad. 5

Dom naroda jednoglasno je usvojio Zakon o izmjenama i dopunama Zakona o krivičnom postupku s 15 amandmana koji su identični amandmanima usvojenim u Predstavničkom domu.

Amandman I.

Član 1. briše se.

Amandman II.

U članu 3. riječ „svaki“ briše se.

Amandman III.

U članu 8. Prijedloga zakona stav (3) briše se.
Dosadašnji st. (5) i (6) postaju st. (6) i (7)

Amandman IV.

U članu 11. stav (2) u novoj tački g) iza riječi: „u skladu s članom 197.“ dodaju se riječi: „i o oduzimanju imovinske koristi pribavljene krivičnim djelima, u skladu s članom 392.“

Amandman V.

U članu 14. stav (2) mijenja se i glasi:
„U članu 47. stav (3) riječi: branilac osumnjičenog, odnosno optuženog ima“ zamjenjuje se riječima: „osumnjičeni, optuženi, odnosno branilac imaju“.

Amandman VI.

U članu 24. u prvom redu iza riječi: „i ako to učine“ dodaju se riječi: „u prisustvu branioca“.

Amandman VII.

Član 29. mijenja se i glasi :
„Ako prepoznavanje nije moguće u skladu sa stavom (3) ovog člana, prepoznavanje će se izvršiti na osnovu prepoznavanja fotografija tog lica ili predmeta postavljenih među fotografijama svjedoku nepoznatih lica ili predmeta iste vrste.“

Amandman VIII.

U članu 38. stav (4) iza riječi :“ako se“ dodaju se riječi :“osumnjičeni ili“.

Amandman IX.

U članu 39. stav (2) mijenja se i glasi :
„U članu 132. stav (1) tačka d) mijenja se i glasi: „u vandrednim okolnostima, ako se radi o krivičnom djelu za koje se može izreći kazna zatvora deset godina ili teža kazna, a koje je posebno teško s obzirom na način izvršenja ili posljedice krivičnog dijela, ako bi puštanje na slobodu rezultiralo stvarnom prijetnjom narušavanja javnog reda“.

Amandman X.

U članu 44. stav (8) riječ „vijeće“ briše se.

Amandman XI.

U članu 66. stav (1) u tački d) iza riječi: „za imovinskopravni zahtjev“ dodaju se riječi: “i oduzimanje imovinske koristi pribavljene krivičnim djelom“.

Amandman XII.

U članu 67. stav (6) u tački a) iza riječi: “za imovinskopravni zahtjev“ dodaju se zarez i riječi: „oduzimanje imovinske koristi pribavljene krivičnim djelom“.

Amandman XIII.

U članu 73. u trećem redu ispred riječi „zahtjev“ dodaje se riječ „opravdan“, a na kraju teksta brišu se navodnici i dodaje nova rečenica, koja glasi „O opravdanosti zahtjeva odlučuje sudija, odnosno predsjednik vijeća.“

Amandman XIV.

Član 103. Prijedloga zakona briše se.

Amandman XV.

Član 110. briše se.

Ad. 6.

Dom naroda većinom glasova usvojio je Zakon o plaćama i naknadama u institucijama Bosne i Hercegovine s 18 amandmana koji su identični amandmanima usvojenim u Predstavničkom domu.

Amandman I.

U članu 1. (Predmet) stav (1) na kraju rečenice stavlja se zarez i dodaje tekst koji glasi: "izuzev plaća i naknada sudija, tužilaca i određenih kategorija stručnog osoblja u pravosudnim institucijama, koje se uređuju posebnim zakonom."

Amandman II.

POGLAVLJE I. - USTAVNI SUD I PRAVOSUĐE, sa članovima 8. i 9. briše se.
Poglavlja II. do IX. u drugom dijelu Prijedloga zakona postaju poglavlja I. do VIII.
Članovi 10. do 65. Prijedloga zakona postaju članovi 8. do 63.

Amandman III.

Član 10. Prijedloga zakona mijenja se i glasi:

(1)

Platni razred	Radno mjesto	Koeficijent
A1	Sekretar doma u Parlamentarnoj skupštini BiH i sekretar Zajedničke službe Parlamentarne skupštine BiH	6,50
A2	Savjetnik predsjedavajućeg i zamjenika predsjedavajućeg doma PSBiH	4,50

Amandman IV.

Član 11. Prijedloga zakona briše se.

Shodno amandmanima na čl. 10. i 11. Prijedloga zakona, u cijelom Zakonu briše se tekst koji se odnosi na poslanike i delegate, što će biti učinjeno prilikom nomotehničke obrade Zakona.

Amandman V.

Član 12. mijenja se i glasi:

Platni razred	Radno mjesto	Koeficijenti						
		nulti	1	2	3	4	5	6
B1	Stručni saradnik	2,10	2,17	2,20	2,25	2,28	2,33	2,37
B2	Viši stručni saradnik	2,35	2,40	2,45	2,50	2,53	2,60	2,70
B3	Stručni savjetnik	2,73	2,80	2,90	3,00	3,10	3,20	3,28
B4	Šef odjela	3,25	3,35	3,50	3,70	3,90	4,10	4,25
B5	Rukovodeći državni službenici (sekretar parlamentarne komisije, pomoćnik sekretara doma, pomoćnik sekretara Zajedničke službe, rukovodilac sektora, interni revizor)	4,20	4,35	4,50	4,65	4,80	4,95	5,05

Amandman VI.

U članu 13. mijenjaju se koeficijenti u sljedećim platnim razredima:

- Platni razred A2- „Predsjedavajući Vijeća ministara“, koeficijent od „9,50“ mijenja se i glasi „9,00“,
 - Platni razred A3- „Zamjenik predsjedavajućeg Vijeća ministara“, koeficijent od „9,00“ mijenja se i glasi „8,80“,
 - U platnom razredu A5, koeficijent „8,00“ mijenja se i glasi „8,20“.
- Ostali koeficijenti u članu 13. ostaju isti.

Amandman VII.

U članu 13. Prijedloga zakona, u platnom razredu A6, iza direktora Direkcije za evropske integracije stavlja se zarez i dodaju riječi: „direktor Direkcije za ekonomsko planiranje“.

Amandman VIII.

1. U članu 13. platni razred A10 „Šef kabineta predsjedavajućeg Vijeća ministara BiH, šef kabineta člana Predsjedništva BiH, koeficijent 4,96, mijenja se i glasi: Platni razred A8 „Šef kabineta predsjedavajućeg Vijeća ministara BiH, šef kabineta člana Predsjedništva BiH koeficijent 6,1“.

2. Platni razredi A8 u Prijedlogu zakona postaje A9, platni razred A9 postaje platni razred A10, platni razred A10 postaje A11.

3. U istom članu platni razred A12 mijenja se i glasi: „Savjetnik predsjedavajućeg Vijeća ministara BiH, savjetnik člana Predsjedništva BiH, koeficijent 4,50 (umjesto 4,08)“.

Amandman IX.

U članu 14. platni razredi B1, B2, B3, B4 i B6 i pripadajući koeficijenti usklađuju se sa platnim razredima i koeficijentima zaposlenih na istim ili sličnim pozicijama iz člana 12. ovog zakona. Također, u platnom razredu B4 dodaju se riječi: „šef grupe u UIO“.

U istom članu, u platnom razredu B5, iza riječi „sekretar upravne organizacije“ dodaju se riječi: „rukovodilac osnovne organizacione jedinice Predsjedništva BiH, šef odsjeka u UIO“, analogno članu 25. ovog zakona, pod B5.

U istom članu, u platnom razredu B8, brišu se riječi: „Generalni sekretar Predsjedništva BiH“, dodaje se novi platni razred B9 s nazivom radnog mjesta: „Generalni sekretar Predsjedništva BiH i koeficijentom 6,50“.

Amandman X.

U članu 22. stav (1) tačka a) postojeći broj: „30%“ mijenja se i glasi: „35%“.

Amandman XI.

U članu 24., u tabelarnom prikazu, vrše se izmjene u sljedećim platnim razredima:

- Spajaju se platni razredi A1 i A2, a postojeći koeficijenti smanjuju se i iznose 8,40.

Ovom izmjenom vrši se pomjeranje platnih razreda kojih sada treba biti ukupno osam.

Amandman XII.

U članu 25., platni razredi B1, B2, B3, B4 i B6 i pripadajući koeficijenti usklađuju se s platnim razredima i koeficijentima zaposlenih na istim ili sličnim pozicijama iz člana 12. ovog zakona.

Amandman XIII.

U članu 29. stav (1) tačka b) alineja 1) broj 30% zamjenjuje se brojem 40%, broj 25% zamjenjuje se brojem 30%.

Amandman XIV.

U članu 40. dodaje se stav (4), koji glasi:

„Vijeće ministara BiH dužno je jednom godišnje dostaviti spisak lica koja koriste prava iz stava (3) ovog člana Parlamentarnoj skupštini BiH.“

Amandman XV.

U članu 45. stav (2) iza riječi u zagradi "maćeha" dodaju se riječi: "usvojlac i hranilac".

Amandman XVI.

U članu 48. stav (1) iza riječi: "provedeno na radu" stavlja se tačka, a preostali dio teksta briše se.

Amandman XVII.

U članu 62. stav (1) tačke b) i c) brišu se.

U istom članu u stavu (2) umjesto: "2011. godine" treba da stoji: "2009. godine".

Amandman XVIII.

U članu 63. (Prestanak važenja ranijih zakona i propisa), podtačka a) briše se, a podtačke b), c), d), e), f), g), h) i j) postaju podtačke a), b), c), d), e), f), g) i h).

Iza tačke h) dodaju se nove tačke i) i j), koje glase:

"i) član 43. stav 4. Zakona o komunikacijama Bosne i Hercegovine ("Službeni glasnik BiH", br. 33/02 i 31/03),

j) čl. 50., 51., 52., 53., 54. i 55. Zakona o Obavještajno-sigurnosnoj agenciji Bosne i Hercegovine ("Službeni glasnik BiH", br.12/04)."

Dom naroda također je usvojio sljedeće zaključke:

Obavezuje se Vijeće ministara BiH da u roku od 60 dana izradi prijedlog zakona o plaćama i naknadama u sudskim i tužilačkim institucijama na nivou Bosne i Hercegovine i dostavi ga u parlamentarnu proceduru.

Dom naroda Parlamentarne skupštine BiH obavezuje Vijeće ministara BiH da u roku od šest mjeseci od primjene Zakona o plaćama i naknadama u institucijama BiH napravi detaljnu analizu i sačini prijedlog izmjena i dopuna navedenog zakona u onim slučajevima kod kojih se ustanovi da je došlo do propusta kod određivanja elemenata plata i naknada i uputi ga Parlamentarnoj skupštini na razmatranje i usvajanje.

Ad. 7.

Dom naroda jednoglasno je usvojio Zakon o Agenciji za identifikacione dokumente, evidenciju i razmjenu podataka BiH u identičnom tekstu kao i Predstavnički dom.

Ad. 8.

Dom naroda jednoglasno je usvojio Zakon o izmjenama i dopunama Zakona o polaganju pravosudnog ispita u BiH u identičnom tekstu kao i Predstavnički dom.

Ad. 9. i 10.

Dom naroda jednoglasno je usvojio u prvom čitanju:

Prijedlog okvirnog zakona o srednjem stručnom obrazovanju i obuci u Bosni i Hercegovini i
Prijedlog zakona o izmjenama i dopunama Zakona o udruženjima i fondacijama.

Ad. 11.

Dom naroda **nije** usvojio Mišljenje Zajedničke komisije za odbranu i sigurnost, te je zadužio Komisiju da ponovo razmotri Prijedlog zakona i dostavi novo mišljenje o principima.

Ad. 12.

Dom naroda jednoglasno je usvojio Izvještaj Zajedničke komisije o usaglašavanju teksta Zakona o izmjenama i dopunama Zakona o upotrebi i zaštiti naziva Bosne i Hercegovine.

Ad. 13.

Dom naroda jednoglasno je imenovao Dušanku Majkić, Rudu Vidovića i Hilmu Neimarliju u Zajedničku komisiju za usaglašavanje teksta Zakona o Fiskalnom vijeću BiH.

Ad. 14.

Dom naroda je za generalnog revizora imenovao Milenka Šegu iz hrvatskog naroda. Za zamjenike generalnog revizora imenovani su Dževad Nekić iz bošnjačkog naroda i Božana Trninić iz srpskog naroda.

Ad. 15.

Dom naroda imenovao je Hazima Rančića, Branka Zrnu i Mladena Ivanića u u Ad hoc komisiju za provođenje procedure za imenovanje:

- a. Nezavisnog odbora kao nezavisnog tijela policijske strukture Bosne i Hercegovine,
- b. Odbora za žalbe građana kao nezavisnog tijela policijske strukture Bosne i Hercegovine.

Ad. 16.

Dom naroda jednoglasno je usvojio izvještaje o radu za 2007. godinu zajedničkih komisija oba doma i to:

- a. Zajedničke komisije za odbranu i sigurnost BiH,
- b. Zajedničke sigurnosno-obavještajne komisije za nadzor nad radom Obavještajno-sigurnosne agencije BiH,
- c. Zajedničke komisije za ljudska prava, prava djeteta, mlade, imigraciju, izbjeglice, azil i etiku,
- d. Zajedničke komisije za administrativne poslove,
- e. Zajedničke komisije za evropske integracije,
- f. Zajedničke komisije za ekonomske reforme i razvoj.

Ad. 17. – 29.

Dom naroda jednoglasno je dao saglasnost za ratifikaciju sporazuma iz ovih tačaka dnevnog reda.

Ad. 30

Dom naroda jednoglasno je usvojio Inicijativu za rješavanje pitanja decertificiranih policajaca Bosne i Hercegovine čiji je predlagač Zajednička komisija za ljudska prava, prava djeteta, mlade, imigraciju, izbjeglice, azil i etiku, kojom predlaže Vijeću ministara BiH, hitno rješavanje pitanja decertificiranih policajaca Bosne i Hercegovine.

S poštovanjem,

PREDSJEDAVAJUĆI
DOMA NARODA
Sulejman Tihić, dipl.iur, s.r.